

rela o mases. Leskere manusha zhana te kaninen leskere haswmen. Vakerela pe dayake, pe dadeske:

– Aryat, but baro misafiri ka ovel man. Kalke misafires – phenela – o Devel chhivchas les mange, me da te ovav zhivdo, soske mange ki dunya gareka, na sine than, nanayas mange gudlo mo zhivotos.

– E, savo misafiri ka ovel tut? – phuchena o dad thay i day.

– Aven zheraty i ka dikhen.

Uryavela pe chhaya o nay-bari shehya, thablyona upral late, sar ko kham, shukar chenya, angrustika, sichko, altunlya upral late. Vakerela pe chhayake:

– Ka beshes te odayate. Kato ka marel o sahati deshduy, ka avel ekh amare manushendar te lel tut, te anel tut pash ko misafirya. Tu te oves hazuri.

Khidinde pes garek, o misafirya sare. E chhayorya lachharde, uryavde, ama i chhayori darala, chhipota lakoro ogi si phanlo. O sahati marela deshduy i avela akana ekh lakere dadeskere manushendar te ingalel la pash ko misafirya. Ola da garek, uzharena e nay-bare misafires, sar vakerdzhas lengoro chhavo. Zhi kate marela o baro sahati – bam-bam-bam – i chhay hulela atar o stulbes natele. Nikon na pendzharela la. I day, o dad e rakleskore, o thagar thay i thagarni, zhankerena prandinel kalke zhuvlyate i uhtindile sare, loshanena.

– Dikh – phendzhas i thagarni – save shukare raklya arakhlyas peske amaro chhavo romnyake!

Hulistili pash ko manusha i o dadoro birden astardzhas la atar o vast. I garek, sikavela la so te kerel.

– Akana – phenela – me mangava te vakerav tumenge, sarilenge, me amalenge, me haswmenge, me dayke, me dadeske ekh but shukar paramisi. Man isine ekh but shukar, but lachhi, but gozhaver romni. Latar po-shukarya na arakhlyom, na dikhlyom. Man mo dad, mi day hohavde, bichhalde man uzh te ukudinav, te achhovav baro manush, te ipalen me romnya, khamni. Te maren, te ipalen me khamne romnya ekhe barvalipnaske. Ama o barvalipe nashti kinela o dehaibe. Amare dehaibmnastar, me romnyasa, byandili kayka chhay. O Devel arakhlyas la nafela manushendar i mange chhivchas la te na merav korkoro ki dunya.

I ikalela o lil.

– Ukudinen – phenela – akana, ukudinen te dikhen, kaskiri si dayka chhay i so kerde me romnyasa o thagar, thay i thagarni amare? Desh bresh garavdzhom me chhaya lendar, te na ipalen li la da.